

Kalaallit Nunaanni aningaasarsiornermut killeqarfimmi imaani avatangiisinik allanngutsaaliuinissaq pillugu inatsimmut Namminersorlutik Oqartussat tapersiinissaat pillugu Inatsisartut aalajangiiffigisassaattut siunnersuut.

(Namminiilivinnermut, Pinngortitamut, Avatangiisinut Nunalerinermullu Naalakkersuisoq)

Saqqummiussissut

(Namminiilivinnermut, Pinngortitamut, Avatangiisinut Nunalerinermullu Naalakkersuisoq)

Siullermeerineq

Nuannaarutigaa Naalakkersuisut sinnerlugit aalajangiiffigisassatut siunnersuut saqqummiussinnaagakku. Inatsisartut Kalaallit Nunaanni aningaasarsiornermut killeqarfimmi imaani avatangiisinik allanngutsaaliuinissaq pillugu inatsisissatut siunnersuummut tapersiissasut, Naalagaaffimmi oqartussaasut qinnuiginninnerannut siunnersuut tunngasuuvoq.

Nunatsinni Aalisarneq takornariartitsinerlu inuussutissarsiutaapput pingaaruteqartut, taamaattumik, imaani avatangiisinik illersuinissarput immikkut pingaaruteqarpoq. Inatsisissatut siunnersuummik matuminnga Kalaallit Nunaata aningaasarsiornikkut killeqarfianut inatsisiliornermi pingaarutilimmik qaffaallatsitsisoqarpoq, maleruagassiat nunani tamalaani isumaqatigiissutinut ileqquusunullu naammassinninnissaannik qulakkeerinnittunik. Inatsisissatut siunnersuut ilaatigut atortorissaarutinik mingutsitsinnginnerpaanik atuinissamik, atortorissaarutinik pitsaanerpaanik atuinissamik najoqutassiamut naapertuuttumik piumasaqaateqarpoq. Najoqutassiaq nunani tamalaani eqqartuussisoqarneraneersuuvoq illersuinissamillu qaffasissumik inissisimalluni.

Ullumikkut 3-sømil-inut killeqarfiup iluani Kalaallit Nunaanni imaani avatangiisinut inatsit atuuppoq, Danmarkimi kunnigip peqqussutaa 2004-imeersoq, 3-sømil-inut killeqarfiup avataani imaani avatangiisinut tunngasunut maleruagassiiviulluni. Danmarkimi Kunnigip peqqussutaa Avatangiisinut aqutsisoqarfimmit aamma Illersornissamut ministereqarfimmit Danmarkimi isumagineqarpoq.

Ukiuni kingulliunerusuni Kalaallit Nunaata imartaanni angallannerit annertusisimapput annertusiartuinnarlutillu, aammalu umiarsuit angallannerat ukiuni aggersuni suli annertuseqqissasq naatsorsuutigineqartariaqarpoq. Taamaattumik imaani avatangiisit allanngutsaaliorneqarnerinut ingerlataqarnernut annertusiartuinnartunut aammalu malitsigisaanik mingutsitsinissap aarlerinartoqarneranut naapertuunnissaata inatsimmi qulakkeerneqarnissaa pisariaqartinneqarpoq. Mingutsitsisoqartillugu imaluunniit mingutsitsisoqarsinnaanerani ulorianartorsiortoqartillugu oqartussaasut piaartumik akuliussinannaanissaannik qulakkeerinnippoq, taamaalilluni Inatsisissatut siunnersuut maleruagassanik imaqarpoq. Taamatut umiarsuup silaannakkulluunniit angallatip piginnittuata, mingutsitsisimasup, mingutsitsinermik akiuiniarnermut aningaasartuutit akilissagai, Inatsisissatut siunnersuummi piumasaqaatigineqarpoq. Aammattaaq piumasaqaatigineqarsinnaavoq, piginnittoq aningaasartuutinut qularnaveeqqusiissasq.

Aningaasarsiornermut killeqarfimmut imaani avatangiisinut maleruagassat nutarterneqarnerisa, inatsisitut immikkoortut pinissaa, Naalagaaffimmi oqartussat naleqqunnerpaatippaat. Taamaaliornikkut ersarinnerusumik inatsisitigut tunngavissaqalersitsisoqassaaq, tassami inatsisissatut siunnersuut, peqqussutip nutarterneqarnerata paarlattuanik, inatsimmut nassuiaatinik, aalajangersakkanut ataasiakkaanut tunngaviusut erseqqissarnissaannut iluaqutaasinnaasunik imaqarpoq.

Inatsisissatut siunnersuutip atuutilernerani uuliamik imaarsisarneq, eqqakkanik imaarsisarneq, nalunaarutiginninnerit, umiarsuup oqimaaloqutaanik passussineq pillugit nalunaarutit tallimat kiisalu akuutissat poortuusersugaatinnagit assartorneqartut pillugit nalunaarut atuutsinneqarsinnaalernissaat anguniarneqassasoq, Naalagaaffimmi oqartussaasut inatsisissatut siunnersuutaanni allassimavoq. Danskit Avatangiisinut Inuussutissanullu ministereqarfiata paasissutissiissutigaa, nalunaarutit nunani tamalaani inatsisinut Kalaallit Nunaannut naapertuuttumik, aammalu Kalaallit Nunaanni oqartussaasut attuumassuteqartut qanimut suleqatigalugit, suliarineqarnissaat naatsorsuutigineqartoq. Allatut oqaatigalugu nunani tamalaani isumaqatigiissutini piumasarineqartut, peqqussutit atortorissaarutininik pissarsiarineqarsinnaasunik pitsaanerpaanik atuinikkut qaffasissumik avatangiisinik illersuineramik qulakkeerinnissamut tapersiissapput.

Naalagaaffimmi oqartussaasut inatsisissatut siunnersuutaat, Naalakkersuisut Siunnersuutaannut uunga: Imaani avatangiisit allanngutsaaliorneqarnissaat pillugu Inatsisartut inatsisaat nr. xx, xx 2017-imeersumut ataqatigiissillugu isigineqassaaq. Naalakkersuisut inatsisissatut siunnersuutaanni imaani akisussaaffeqarfik maleruagassiivigineqarpoq, danskit inatsisissatut siunnersuutaanni aningaasarsiornermut killeqarfik maleruagassiivigineqarluni. Naalagaaffimmi oqartussaasut inatsisissatut siunnersuutaanni aamma Naalakkersuisut inatsisissatut siunnersuutaanni suliarineqarnerannut atatillugu, danskit oqartussaasui aamma kalaallit oqartussaasui qanimut suleqatigiipput. Oqaloqatigiinnerup kingunerisaanik inatsisissatut siunnersuutit sapinngisamik imminnut naapertuupput.

Siunnersuutip matuma akuerineqarnerani Kalaallit Nunaanni aningaasarsiornermut killeqarfimmi imaani avatangiisinut tamakkiisumik maleruagassaqalernissaq qulakkeerneqassaaq.

Taamatut oqaaseqarlunga siunnersuutip Inatsisartuni kajumittumik suliarineqarnissaa inassutigaa.